

### III. OUTRAS DISPOSICIÓNS

#### VALEDOR DO POBO

*RESOLUCIÓN do 24 de setembro de 2025 pola que se aproba a convocatoria da sexta edición dos premios Valedora do Pobo aos mellores traballos fin de grao (TFG) e traballos fin de máster (TFM) en materia de igualdade e dereitos das mulleres.*

O Valedor do Pobo, en colaboración coa Universidade de Santiago de Compostela, a Universidade da Coruña e a Universidade de Vigo, resolve convocar a sexta edición dos premios Valedora do Pobo aos mellores traballos fin de grao (TFG) e traballos fin de máster (TFM) en materia de igualdade e dereitos das mulleres, que se rexerá de acordo coas seguintes bases:

Primeira. *Obxecto*

Estas bases teñen como obxecto regular a concesión dos VI premios Valedora do Pobo aos mellores traballos fin de grao (TFG) e traballos fin de máster (TFM) en materia de igualdade e dereitos das mulleres.

Segunda. *Requisitos*

Os traballos deberán destacar polo seu elevado valor en materia de igualdade e dereitos das mulleres.

Os dereitos sobre os traballos presentados non poderán estar cedidos a terceiros con carácter de exclusividade.

Os traballos deberan ter sido lidos, defendidos ou xulgados e aprobados, segundo proceda, ante calquera universidade galega durante o curso académico 2024/25.

Os traballos presentaranse en idioma galego ou castelán. No caso de que se presentaren en idioma distinto dos anteriores, deberá achegarse tradución.

Terceira. *Solicitudes*

As solicitudes axustaranse aos modelos de instancia que figuran como anexos I e II, que estarán á disposición das persoas interesadas no enderezo electrónico do Valedor do



Pobo ([www.valedordopobo.gal](http://www.valedordopobo.gal)), da Universidade de Santiago de Compostela ([www.usc.es](http://www.usc.es)), da Universidade da Coruña ([www.udc.es](http://www.udc.es)) e da Universidade de Vigo ([www.uvigo.es](http://www.uvigo.es)), e no Rexistro do Valedor do Pobo (rúa do Hórreo, nº 65, 15701 Santiago de Compostela, A Coruña) das 9.00 ás 14.00 horas e das 16.30 ás 19.00 horas, de luns a xoves, e das 9.00 ás 14.00 horas os venres, e nos rexistros das universidades citadas.

Coas solicitudes presentarase a seguinte documentación:

Traballos fin de grao (TFG) e traballos fin de máster (TFM) en formato papel e en formato electrónico (CD ou *pendrive* en formato Word, Libreoffice ou LaTeX (anexo I).

As persoas interesadas poderán presentar a súa solicitude unicamente a un dos premios.

#### Cuarta. *Lugar e prazo de presentación*

Os traballos, dirixidos á valedora do pobo, presentaranse no Rexistro do Valedor do Pobo ou nos rexistros da Universidade de Santiago de Compostela, da Universidade da Coruña ou da Universidade de Vigo, ou por calquera dos medios establecidos no artigo 16 da Lei 39/2015, do 1 de outubro, do procedemento administrativo común das administracións públicas.

No suposto de que non se presenten no Rexistro das entidades convocantes, deberá enviarse, dentro do prazo de presentación, unha comunicación vía correo electrónico ([registro@valedordopobo.gal](mailto:registro@valedordopobo.gal)) na cal se detalle o medio utilizado de presentación segundo o modelo que consta no anexo II.

As solicitudes presentaranse a partir do día seguinte ao da publicación da resolución da convocatoria no *Diario Oficial de Galicia* e ata o 15 de decembro de 2025. As persoas interesadas poderán consultar as bases da convocatoria no DOG e nas páxinas web do Valedor do Pobo e das universidades galegas.

Se a solicitude non reúne os datos ou os documentos exixidos, a persoa interesada disporá de dez (10) días hábiles desde a recepción da notificación de emenda para corrixir a falta ou achegar os documentos preceptivos. No caso de non o facer, considerarase desistida da súa petición.



Sen prexuízo do anterior, poderase requirir a persoa solicitante para que achegue cantos datos, documentos complementarios e aclaracións resulten necesarios para a valoración do traballo presentado. De non o facer, considerarase desistida da súa petición.

As comunicacións realizaranse exclusivamente a través do enderezo de correo electrónico proporcionado polas persoas solicitantes.

Quinta. *Xurado*

1. O xurado estará composto polos seguintes membros:

Presidenta: Dolores Fernández Galiño, valedora do pobo ou persoa que a substitúa ou en quen delegue.

Vogais:

María Xosé Porteiro García, adxunta á valedora do pobo ou persoa que a substitúa ou en quen delegue.

María Castro Parga, responsable do Valedor do Pobo en materia de xénero ou persoa que a substitúa.

Antonio López Díaz, reitor da Universidade de Santiago de Compostela, ou persoa en quen delegue, elixida pola súa traxectoria profesional e persoal en materia de igualdade.

Ricardo Cao Abad, reitor da Universidade da Coruña, ou persoa en quen delegue, elixida pola súa traxectoria profesional e persoal en materia de igualdade.

Manuel Reigosa Roger, reitor da Universidade de Vigo, ou persoa en quen delegue, elixida pola súa traxectoria profesional e persoal en materia de igualdade.

Secretario: Fernando de Andrés Alonso, secretario xeral do Valedor do Pobo.

2. Unha vez constituído o xurado, publicarase a relación nominal dos seus compoñentes na páxina web do Valedor do Pobo.

3. De xeito orientativo, o procedemento que seguirá o xurado será:

a) Cada integrante do xurado daralle a cada traballo, segundo o seu acreditado saber, unha puntuación de 0 a 2.



b) Pasarán á seguinte fase aqueles traballos que obteñan a puntuación máxima de, polo menos, unha persoa membro do xurado do Valedor e, polo menos, unha persoa membro do xurado en representación das universidades, e os traballos que obteñan a puntuación máxima, ben dos tres membros do xurado procedentes das universidades, ben da institución Valedor do Pobo.

c) Dos traballos que pasen á segunda fase, cada membro do xurado, segundo o seu acreditado saber, propondrá unha escolma daqueles traballos que considere que poden optar a cadanseu premio, e exporá sucintamente as razóns da súa proposta.

d) Na última fase, a deliberación e a votación comezará polos traballos que obteñan maiores apoios, sucintamente expostos entre os membros do xurado.

4. Para o non disposto nestas bases serán de aplicación as normas contidas no capítulo II, sección terceira, da Lei 40/2015, do 1 de outubro, de réxime xurídico do sector público.

#### Sexta. *Resolución*

Unha vez valorados os traballos fin de grao (TFG) e traballos fin de máster (TFM) presentados, o xurado emitirá a resolución no prazo máximo de seis meses contados a partir do día de finalización do prazo de presentación.

As decisións tomaranse por maioría e a Presidencia do xurado terá voto de calidade en caso de empate.

O xurado poderá outorgar premio *ex aequo* en caso de empate ao mellor traballo fin de grao (TGF) ou ao mellor traballo fin de máster (TFM). Neste caso, outorgaráselles o diploma acreditativo e dividirase a contía económica fixada entre as persoas premiadas en cada categoría.

No caso de non acadaren os apoios necesarios os traballos presentados, poderase declarar algún ou todos os premios desertos.

O ditame do xurado será inapelable e publicarse no *Diario Oficial de Galicia* e nas páxinas web das entidades convocantes.



*Sétima. Aceptación das bases e autorización ás entidades convocantes dos premios para a publicación*

A participación nesta convocatoria supón a aceptación expresa destas bases, así como a autorización á valedora do pobo para a publicación, por calquera medio, dos traballos premiados. Para os efectos da súa publicación, poderase solicitar a adaptación do traballo ao habitual das publicacións institucionais.

*Oitava. Dotación e tramitación dos premios*

1. O xurado poderá conceder os seguintes premios:

- Premio ao mellor traballo fin de grao (TFG): 1.500 € e diploma acreditativo.
- Premio ao mellor traballo fin de máster (TFM): 1.500 € e diploma acreditativo.

2. Os premios aboaranse con cargo á aplicación orzamentaria 0102 111B 480 00 da institución do Valedor do Pobo para 2026, que queda condicionada á existencia de crédito nese exercicio.

3. O pagamento dos premios estará suxeito as retencións e ao réxime fiscal que sexa de aplicación.

4. Unha vez notificado o premio, as persoas premiadas deberán presentar, no prazo de quince días, a seguinte documentación:

- Certificado académico en que se especifiquen o título do traballo, director/a deste, cualificación obtida e, de ser o caso, data de lectura e tribunal que a xulgou.
- Acreditación de estar ao día nas súas obrigas coa Facenda estatal e autonómica e coa Seguridade Social.
- Copia do certificado de conta bancaria da súa titularidade.
- Declaración responsable sobre o réxime fiscal das persoas premiadas.

*Novena. Revogación dos premios*

O incumprimento das condicións que se tiveron en conta para a concesión dos premios poderá dar lugar á súa revogación, así como ao reintegro das cantidades percibidas.



Décima. *Datos de carácter persoal*

As institucións convocantes publicarán na súa páxina web oficial as distintas fases de tramitación do procedemento de concesión dos premios, polo que a presentación da solicitude leva implícita a autorización para o tratamento necesario dos datos das persoas presentadas e da súa publicación na páxina web institucional.

En cumprimento do disposto na Lei orgánica 3/2018, do 5 de decembro, de protección de datos persoais e garantía dos dereitos dixitais, infórmase de que os datos persoais recollidos na solicitude de participación na convocatoria se incorporarán a un ficheiro para o seu tratamento, coa finalidade da xestión deste procedemento. Os/as solicitantes poderán exercer os dereitos de acceso, rectificación, cancelación e oposición previstos na lei mediante un escrito dirixido á valedora do pobo.

Décimo primeira. *Facultades da valedora do pobo.*

Facultase a valedora do pobo para ditar as resolucións necesarias para o axeitado desenvolvemento desta convocatoria.

Santiago de Compostela, 24 de setembro de 2025

María Dolores Fernández Galiño  
Valedora do pobo en funcións



**ANEXO I****Solicitud de participación na sexta edición dos premios Valedora do Pobo aos mellores traballos fin de grao (TFG) e traballos fin de máster (TFM) en materia de igualdade e dereitos das mulleres**

Nome	Apelidos	
DNI	Correo electrónico	Teléfono
Universidade en que se presentou o traballo		
Data en que se presentou		

Expón que desexa participar na sexta edición dos premios Valedora do Pobo aos mellores traballos fin de grao (TFG) e traballos fin de máster (TFM) en materia de igualdade e dereitos das mulleres.

....., ..... de ..... de 2025

(Sinatura)

Documentos que achega:

Traballo fin de grao (TFG) en formato de papel e electrónico (CD ou *pendrive* en Word, Libreoffice ou LaTeX) titulado: .....

Traballo fin de máster (TFM) en formato de papel e electrónico (CD ou *pendrive* en Word, Libreoffice ou LaTeX) titulado: .....

Síntese descritiva do traballo:



**ANEXO II****Modelo de comunicación de presentación da solicitude**

A persoa autora do traballo fin de grao/traballo fin de máster co título .....

Manifesta que presentou solicitude de participación na sexta edición dos premios Valledora do Pobo aos mellores traballos fin de grao (TFG) e traballos fin de máster (TFM) en materia de igualdade e dereitos das mulleres con data do ..... en<sup>1</sup> .....

(Sinatura)

<sup>1</sup> Indíquese o lugar de presentación de conformidade co disposto no artigo 16 da Lei 39/2015, do 1 de outubro, do procedemento administrativo común das administracións públicas.

